

Sam Pesos blong Papa long Heven

I Kam long Anjela Penia Dale

"Kipim olgeta komanmen. I gat sefti mo pis" (luk long Children's Songbook, 146).

Ana i kakae las pis blong totila blong hem. Hem i sopsop mo olsem i tes naes tumas. Ana i laekem tumas ol totila blong bubuwoman blong hem. Oli bes pat blong kaekae long moning.

Ana i lukluk bubuwoman blong hem, Abuela, i wasem ol plet.

Hem i semmak olsem evri moning. Be i gat wan samting we i no semmak.

Abuela i stap wokbaot nomo i go long maket blong pem kaekae. Be i no tedei. Tedei, i no gat mane blong pem kaekae.

"?Bae mifala i kakae wanem tumoro?" Ana i askem hemwan.

Nao Ana i tingbaot. !Hem i save se weaples i gat mane! Las naet, hem i luk Abuela i putum sam pesos insaed long wan smol waet klos.

"Abuela, ?yu fogetem? Yu gat mane blong pem kaekae."

"?Wanem mane?" Abuela i askem.

Ana i ron blong karem mane i kam. Hem i seksekem smol bag ia wetem ol koen. *!Kling! !Kling!*

Abuela i smael. "Hemia taeting blong yumitu, Ana. Hemia i mane blong *Hem.*"

"?Bae yumitu kakae wanem tumoro?" Ana i askem.

"Yu no wari," Abuela i talem.

"Mi gat fet se Papa long Heven bae i helpem yumitu."

Long nekis moning, Abuela i givim las kon totila long Ana. Nao hem i sidaon long jea blong hem. Hem i stap somap ol red flaoa

long wan dres mo i stap talem ol stori blong taem we hem i wan smol gel. Hem i no luk se hem i stap wari.

Nao Ana i harem man i noknok long doa. Ana i ron blong openemdoa.

"!Angkel Pedro!"

Angkel Pedro i talem: "Mi gat wan filing blong visitim yutufala." Hem i putum tri basket antap long tebol. Insaed long wan i gat ol kon totila. Long narawan i gat mit. Long narawan moa i gat fres vejetebol we i kam long maket.

"O gudfala boe blong mi," Abuela i talem. "!Bae mi mekem bes mitbol sup blong yu kakae!"

Angkel Pedro i talem: "Sup blong yu i beswan long wol."

Ana i laf mo klapem han blong hem.

Afta hem i stop. I gat wan samting we hem i bin wantem save. "Abuela, yu yu bin save se bae Angkel Pedro bae i kam tedei? ?Hemia nao yu no stap wari long hem?"

"No" Abuela i talem. "Taem mi pem taeting blong mi, mi gat fet se Papa long Heven bae i blesem mi. !Mo Hem i mekem!"

Ana i haggem Abuela. Hem i filim se hem i gel we i moa hapi long Meksiko. Hem mo Abuela, tufala i gat fet long Papa long Heven. !Mo naoia, hem i no save wet blong kakae gudfala sup blong Abuela! ■

Woman we i raet i stap laef long Not Karolina, YSA.